

ARTIKEL “BALI ORTI”
HARIAN BALI POS DENPASAR

Dipublikasikan, 10 Agustus 2014

**Swadharmaning Para Yowana
Ngarepin Era Global**

Antuk

Dr. Drs. I Nyoman Suwija, M.Hum.
(IKIP PGRI Bali)

Kawéntenan jagaté mangkin sampun kadi aor tan patepi, sané ketah kabaos *era kesejagatan* utawi *éra global*. Ngarepin éra global, nénten pisan dados ngléwa, patut nganutin ajahan *agni brata*, madué semangat kadi agni murub (*bagaikan api yang berkobar*). Sareng sami patut semangat, nincapang kawiklanan (*pengetahuan*) miwah kawagedan (*keterampilan*). Sasampun wikan tur waged, patut sayaga “*ramé ing gawé sepi ing pamerih*” utawi *Kerja keras, kerja cerdas*, miwah *kerja ikhlas*.

Mangkin sapunapi antuk mangda dados anak wikan? Majanten patut sayaga nincapang kaonengan ngwacén. Duaning wénten slogan jagat, *Buku adalah gudangnya ilmu, membaca adalah kuncinya*. Para yowana sami, mangda setata numbuhan pikayunan becik, seneng ngwacén, ngulik-ngulik sastra aji, duaning *sastra makasuluh ikang praba*. Tetujonnyané, mangda prasida manados generasi sané inggil. Manut Bapak SBY, generasi inggil inggih punika generasi sané *imbang intelektualitas* miwah *moralitasnyané*. Becik aji kaweruhané, taler madué budi satwam utawi parisolah sané luh utama. Yéning dados anak wikan nénten maweweh wicaksana utawi *jujur*, majanten nénten pacang mawiguna. Akéh anak wikan ring jagaté, nanging sané wicaksana utawi *jujur* kanton arang pisan. Yéning meled dados anak wikan, patut masuluh ring sastra aji, yéning meled dados anak wicaksana, patut masuluh ring ajahan agama.

Pinaka conto, akéh élite politiké sané katiben kasus suap miwah korupsi. Wénten pegawé pajak sampun mabui, wénten mantan menteri sampun mabui, wénten anggota DPR sampun mabui, wénten mantan réktor mapangkéng ring LP Krobokan, akéh malih sané lianan. Puniki maka imba generasi sané nénten inggil, duaning kewiklanan miwah budi satwamnyané nénten imbang.

Mantuk ring para yowanané, ri kanton alit tur anom kadi mangkin, ngiring inutin peparikan Baliné kadi asapuniki. “*Kedis curik ninggahin gajah, ada nolih ia makeber. Enu cerik anteng malajah, suba kelih dadi dokter*”. Dokter iriki makasimbol aji kaweruhan utawi kawiklanan. Tegasiipun, yéning meled dados anak wikan, patut jemet

malajah. Wénten malih slogan tiosan sané patut inutin, “*Masa muda masa belajar, tiada hari tanpa belajar*”. Punika mawinan iaga patut nincapang kaonengan ngwacén.

Inggih, para yowana sané asihin titiang. Ngiring ulengang pikayunané! Sapunapi ja antuk, mangda sayan limbak aji kaweruhan druéné, manados anak wikan sané wicaksana. Nirguna kabaos anaké sané nénten kayun ngruruh kawiklanan. Taler nirgawé anaké madué kawiklanan, yéning nénten kanggén ngwangun kasukertan jagat. Maiketan ring puniki, titiang naenan ngwacén *kata-kata bijak* asapuniki. “*Bekerja keras tanpa kecerdasan tidak akan ada gunanya; Orang cerdas yang tidak mau bekerja dengan jujur sama dengan bohong; Tidak cerdas dan tidak mau bekerja lebih bloon lagi.*”

Malarapan punika, ri kala ngarepin era global, wénten malih sloka Kawi sané patut telebang, kadi asapuniki. “*Taki-takining sewaka guna widia, asing gawé pageh-pagehen*”. Tegesipun, saking alit ngiring mataki-taki, jemetang malajah, ngidepang daging baos bapak-ibu guruné, saluir pakaryan, *tugas-tugas* utawi *PR* sané kapaica, patut kakaryanang antuk manah lascarya. Sapa sira ja nénten kayun malajah, pacang kalindas antuk era global, anaké sané jemet malajah pacang sida molihgawé, ngulati kahuripan sukerta santi, *sejahtera* miwah *damai*.

Inggih, Ida-dané miwah para sameton yowana Bali sané wangiing titiang. Napi lui sané sampun tlatarang titiang diwawu, prasida kacutetang kadi asapuniki.

- 1) Makasami para yowana Baliné patut jemet malajah, nincapang kaonengan ngwacén, ngulatiang aji kaweruhan.
- 2) Ngiring perangin katambetané, mangda prasida ngarepin era global ngulatiang kahuripan sukerta santi.

Inggih, wantah asapunika atur pawungun titiang majeng ring ara yowawané makasami. Badung magapura, ngabas ebet titiang ring Pétang. Kirang langkung nunas ampura, antuk tambet titiang kalintang. Mogi rahajeng sareng sami.